

PEMBERITAHUAN PERTANYAAN BAGI JAWAPAN BUKAN LISAN

MESYUARAT KEDUA, PENGGAL KEEMPAT,

PARLIMEN KETIGA BELAS,

MAJLIS MESYUARAT DEWAN RAKYAT

PERTANYAAN : BUKAN LISAN

DARIPADA : DATUK ROZMAN BIN ISLI

SOALAN :

Datuk Rozman bin Isli [Labuan] minta **PERDANA MENTERI** menyatakan potensi dan cabaran-cabaran akhir yang sedang dihadapi dalam kita mengharungi tahun-tahun terakhir sebelum melayakkan negara Malaysia sebagai negara maju berpendapatan tinggi dan bila agaknya kita akan mencapai status itu.

JAWAPAN: YB SENATOR DATO' SRI ABDUL WAHID B. OMAR,
MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, sasaran untuk mencapai negara maju berpendapatan tinggi menjelang tahun 2020 adalah mengikut acuan kita sendiri. Dari aspek ekonomi, antara petunjuk penting dan kritikal untuk mencapai status negara maju dan berpendapatan tinggi ialah pembentukan sebuah ekonomi yang dinamik, berdaya saing, berdaya tahan dan bersifat inklusif. Selepas 25 tahun Wawasan 2020 diperkenalkan, asas ekonomi negara terus kukuh di mana prestasi ekonomi negara kekal mampan dan telah mencatat pertumbuhan purata tahunan benar sebanyak 6% dalam tempoh tahun 1991 hingga tahun 2015. Dari segi struktur ekonomi pula, Malaysia telah pun mencerminkan struktur ekonomi negara maju di mana sumbangan sektor perkhidmatan kepada ekonomi kini adalah 54% dan sektor pembuatan sebanyak 23%. Sementara itu, negara masih dapat mengekalkan kadar inflasi dan kadar pengangguran yang rendah.

Dengan pengukuhan asas ekonomi ini, Pendapatan Negara Kasar (PNK) per kapita telah meningkat 4.6 kali daripada RM7,829 (AS\$2,847) pada tahun 1991 kepada RM36,285 (AS\$9,291) pada tahun 2015. Oleh itu, negara sedang berada atas landasan yang betul untuk mencapai status negara maju dan berpendapatan tinggi menjelang 2020. Ini adalah berdasarkan perbandingan dengan tahap minimum PNK per kapita yang ditetapkan oleh Bank Dunia pada masa ini iaitu sebanyak AS\$12,736 untuk menjadi negara berpendapatan tinggi.

Dari sudut sosioekonomi pula, kadar kemiskinan telah berkurang daripada 49.3% pada tahun 1970 kepada 0.6% pada tahun 2014, manakala kemiskinan tegar telah berjaya dibasmi. Pendapatan bulanan purata isi rumah meningkat lebih 20 kali daripada RM264 pada tahun 1970 kepada RM6,141 pada tahun 2014. Dalam tempoh yang sama, pendapatan penengah meningkat daripada RM166 kepada RM4,585. Jurang pendapatan juga semakin mengecil seperti yang ditunjukkan oleh pekali Gini daripada 0.513 pada tahun 1970 kepada 0.401 pada tahun 2014.

Tuan Yang di-Pertua,

Antara cabaran utama yang kita hadapi dalam mencapai status negara maju berpendapatan tinggi adalah produktiviti yang masih rendah. Pada masa ini, produktiviti negara masih rendah berbanding dengan negara-negara maju dan beberapa negara membangun. Di samping itu, negara masih lagi bersaing dengan negara-negara serantau dari segi ekonomi berintensif buruh dengan kos rendah berbanding model berintensif inovasi. Oleh itu, terdapat potensi yang besar bagi negara untuk membuat lonjakan dan merapatkan jurang perbezaan ini.

Dalam menangani cabaran ini, melalui Rancangan Malaysia Kesebelas (RMK11), Kerajaan telah menggariskan strategi untuk mengukuhkan lagi daya tahan ekonomi ke arah pembangunan yang mampan dan inklusif dalam tempoh lima tahun akan datang. Langkah-langkah tersebut termasuklah:

- i. Meningkatkan produktiviti dan inovasi untuk memastikan pertumbuhan yang mampan dan inklusif. Dalam hubungan ni,

pertumbuhan KDNK akan dipacu oleh peningkatan dalam produktiviti dan kebergantungan kepada input modal dan pekerja akan dikurangkan. Usaha bagi meningkatkan produktiviti akan dilaksanakan di semua peringkat iaitu makro, industri dan firma serta diterajui oleh juara industri;

- ii. Meningkatkan pembangunan modal insan termasuk mengupayakan pendidikan dan latihan teknikal serta vokasional ke arah mewujudkan lebih ramai pekerja mahir bagi memenuhi keperluan industri akan datang;
- iii. Menggalakkan lagi pelaburan swasta untuk menerajui pertumbuhan ekonomi;
- iv. Meningkatkan lagi eksport untuk menambah baikimbangan perdagangan;
- v. Meningkatkan fleksibiliti dasar fiskal untuk memastikan kedudukan kewangan Kerajaan Persekutuan yang lebih mampan; dan
- vi. Meningkatkan kesejahteraan rakyat termasuk meningkatkan taraf hidup isi rumah B40 ke arah masyarakat kelas menengah.

Berdasarkan kepada langkah yang saya sebutkan tadi, Kerajaan yakin negara mampu untuk terus mengekalkan pertumbuhan ekonomi yang mampan serta berada di landasan untuk mencapai tahap ekonomi berpendapatan tinggi menjelang tahun 2020.

Namun, definisi sesebuah negara maju adalah lebih dari sekadar pencapaian ekonominya. Ia merangkumi pelbagai aspek pembangunan masyarakat, termasuklah membentuk masyarakat yang bersatu padu, bermoral dan beretika, liberal dan bertolak ansur, saintifik dan progresif, serta masyarakat yang penyayang dan makmur. Kita perlu mencapai semua matlamat ini sebelum kita boleh menganggap Malaysia sebagai satu negara yang benar-benar maju.

Sekian, terima kasih.